

AWIG-AWIG DESA ADAT ALASNGANDANG



DESA PEMPATAN
KECAMATAN RENDANG
KABUPATEN KARANGASEM

MURDA WAKYA

“ Om Swastyastu “

Om Awignam Astu Namu Sidham

Purwa pangastunkaran titiang Krama Desa Alas Ngandang, ring bukpadan Ida Sang Hyang Widhi Wasa sangkan paraning dumadi, Bhatara-Bhatari sane malingga ring Pura Puseh Alas Ngandang minakadi Pura Kahyangan sami sane wenten sajroning wawengkon Desa Alas Ngandang, dwaning melarapan saking krete wara nugrahan paduka Bhatara Samudhaya karya puniki kasidha puput.

Kaping kalih hatur angayubaggyan titiang Krama Desa Alas Ngandang, pinghajeng ring ida dane para panglingsir, keliang, pemangku, minakadi ida dane sang meraga cestakara widaddha pradnyan wicaksana sareng sami, sane sampun sangkaning sweccha ledang sareng mapawangun ngripta uger-uger marupa awig-awig Desa Pakraman Alas Ngandang puniki, pacang kanggen sepat siku-siku sajroning desa kantos kaungkur wekas.

Taler majeng ring Pamarintah Daerah Kabupaten Karangasem, para manggala sane mastika ngiwang patutang awig-awig, titiang ngaturang pangayu bagya, dwaning sampun kasiddhan nureksa, maritetes saha mastika, kantos merupa puput.

Mungging dagingipun manut Tri Hita Karana, indik kahyangan genah ngadisthana Ida Sang Hyang Parama Wisewa indik pawongan pinaka krama desa. Indik palemahan punika wawidhangan wewengkon desa, mebantang antuk lekita sastra agama, sesana, paswara, dresta minakadi sane sawosan, sane hanut ring pemargin dharma agama kalih dharma negara dumadak kasiddhan mamangguhang kajagaddhitan sekala niskala.

Om Santi Santi Santi Om

**PRATAMAS SARGAH
HARAN LAN WAWIDANGAN DESA**

Pawos 1

- (1) Desa puniki mawasta “ Desa Pakraman Alasngandang “ selanturipun kinucap kalih kasuratang sajroning lekita “Desa Alasngandang”.
- (2) Wawengkon Prabumyan Desa Alasngandang mawaneng nyatur desa, manut sekadi kinucap ring sor puniki :
 - ha. Sisi wetan utawi kangin : Panepin Desa Pakraman Waringin
 - na. Sisi kidul utawi kelod : Panepin Desa Pakraman Kubakal lan Desa Pakraman Pempatan
 - ca. Sisi kulon utawi kawuh : Panepin Kabupaten Bangli
 - ra. Sisi lor utawi kaler : Panepin Desa Pakraman Waringin
- (3) Sajeroning wewengkon desa Pakraman Alasngandang wenten banjar mawasta banjar Alasngandang
- (4) Sajeroning banjar Alasngandang wenten tempekan Iwire :
 - ha. Tempek Kaja Kangin
 - na. Tempek Tengah
 - ca. Tempek Kelod Kangin
 - ra. Tempek Kaja Kauh
 - ka. Tempek Kelod Kauh
 - da. Tempek Geluwung

**DWITYAS SARGAH
PIKUKUH LAN PATITIS TATUJON**

Pawos 2

Maka pikukuh Desa Pakraman Alasngandang, Ngarajegang, mikukuhin, kalih mitidihin pisan :

- (1) Pancasila
- (2) Undang – undang Dasar 1945
- (3) Tri Hita Karana.

Desa Pakraman Alasngandang Ngemanggehang Patitis tatujon lwiripun :

- (1) Ngutamayang tata cara maagama Hindu.
- (2) Ngawangunang katreptian sajroning Desa Pakraman, mangda kasidhan rajeg katreptyaning praja.
- (3) Ngawrediyang kawicaksanan minakadi kapradnyanan maka larapan gumawe gemuh landuhing praja.
- (4) Ngamanggehang kalih ngawrediyang druweyaning desa, majalaran kawicaksanaan guna laksana manut dharma prawreti.
- (5) Ngarajegang Dharma Agama miwah Dharma Nagara.

**TRITYAS SARGAH
SUKERTA TATA PAKRAMAN**

Palet 1

Indik Krama

Pawos 4

- (1) Sane Kasinanggeh krama Desa Pakraman Alasngandang lwire :
 - ha. Sang sapisira hugi jenek magenah ring wawengkon Desa Pakraman Alasngandang lintang ring pasasur dina utawi 35 dina, sane rajeg maagama Hindu.
 - na. Sang sapisira hugi wed saking desa pakraman Alasngandang jenek magenah ring dura desa liwaring desa Alasngandang nanging kantong mipil ring banjar utawi ring desa pakraman Alasngandang, sane mula pagenahannya nguni.
- (2) Papalihan krama, kadi hinucap ring sor puniki :
 - ha. Krama Ngarep Mawed : krama desa sane bulangkep, wed saking desa pakraman Alasngandang sane sampun mipil ring Banjar utawi ring desa Pakraman Alasngandang, saha matata turun cumek maayahan saurah-arih.
 - na. Krama Ngarep, inggih punika krama desa sane mawit saking dura desa liwaring desa pakraman alasngandang, jenek magenah ngawengku karang pagunakaya, matata turun cumek, mapaayahan saurah-arih ring desa pakraman Alasngandang

- ca. Deha Teruna : Krama desa sane durung mipil ring banjar utawi ring desa pakraman Alasngandang, sakadi truna-truni sane kantun kukuhub antuk krama marep lan krama tamyu.
- ra. Krama Nyada, krama desa sane sampun tan kené ayahan lan papeson, lwire :
- 1) Sangkaning mapinunas ngaraga tur sampun kalugra antuk prajuru desa
 - 2) Mabukti sungkan rahat tur tan siddha waras
 - 3) Antuk lingsir tan siddha maayahan sesampun meyusa 70 warsa
 - 4) Sankaning kakundulan
- ka. Krama Balu, krama desa lanang wiyadin istri, sane katinggal seda antuk rabinnya, krama desa lanang kakawonin nyapian antuk rabine. Wenten balu camput wenten balu masentana.
- da. Krama Ring Dura Desa : sang sapisira hugi wed saking Desa Pakraman Alasngandang, jenek magenah ring dura desa liwaring desa pakraman Alasngandang, nanghing manggeh mipil ring banjar utawi ring desa pakraman Alasngandang sane mula pagenahannya nguni.
- ta. Krama Tamyu, inggih punika Sang sapa sira hugi wed saking dura desa liwaring desa Alasngandang, jenek magenah ring wawengkon desa pakraman Alasngandang, tan ngawengku karang pomahan, madadunung ring pomahaning krama desa, magenah ring pomahan druwen guru wisesa, hotel miwah salwiripun, makekubon ngenahin tegal naghing kari manggeh makrama desa ring kamulan desanya, kabuktiyang antuk surat sasinahan saking kliyang desanya.
- (3) Tamyu : sang sapisira hugi rawuh ka jroning desa pakraman Alasngandang, nanghing tan nekeh magenah irika, sang sane nerima tamyu punika patut matur supeksa ring Prajuru desa, kalih ring sang amawa rat. Yan tan asapunika, prajuru desa wenang nundung jatma hinucap mangda matinggal saking desa TAlasngandang.

Pawos 5

Ngawit tedun makrama desa, ring desa pakraman Alasngandang:

- (1) Krama desa Ngarep mawed kalih jenek ring wawengkon desa pakraman Alasngandang, mipil ring banjar utawi ring desa Alasngandang, malarapan antuk tateragan banjar utawi desa lwire : sasampun nem sasih saking dina pewidiwidana pawiwahan, sanistanya sampun puput mabiyakawon.

- (2) Krama Ngarep sane mawit saking dura desa, jenek magenah ring wawengkon desa pakraman Alasngandang, sasampun patsasur dina saking pasadoke.
- (3) Sang sapa sira hugi wed saking dura desa magenah ring wawengkon desa pakraman Alasngandang, sampun lintang ring patsasur dina katerag antuk banjar utawi desa pakraman Alasngandang
- (4) Krama desa wed saking desa pakraman Alasngandang, matinggal ka dura desa, wastu malih mawali ka desa pakraman Alasngandang :
 - ha. Yan sangkaning rahayu kalih saking palugrahan Prajuru desa patinggale nguni, wenang mawali mipil ring banjar utawi ring desa pakraman Alasngandang, nganutin sukretan banjare punika ;
 - na. Yan sangkaning tan rahayu patinggale nguni, yogya kelian banjar sane katuju ngatengahang babawose ka desa, mangda kabawosan antuk prajuru desa. Yan katinutin tatepasan prajuru desa punika, tur kacihnayang antuk maguru piduka ring salah sinunggil Pura Kahyangan Tiga Desa Pakraman Alasngandang, prasiddha kalugra mipil pinaka Krama Desa Pakraman Alasngandang.

Pawos 6

Husan makrama desa ring Desa Pakraman Alasngandang, melarapan antuk :

- 1) Seda;
- 2) Sangkaning pinunas ngaraga, saha polih palugrahan Prajuru Desa Pakraman Alasngandang
- 3) Tedah utawi tilar saking Agama Hindu.
- 4) Kasepe kang saha Kaheladang antuk desa.

Pawos 7

wadharmaning Krama Desa Pakraman Alasngandang lwire :

- 1) Krama ngarep mawed, krama ngarep yogya keni urunan miwah paayah-ayahan mamungkul, nyanggra saraja karyan desa, manut hunggwan sowang-sowang.
- 2) Deha Truna, yogya ngarombo saraja karya sane kapucukin antuk krama desa ngarep lan krama tamu, yan wenten pabuwat saking desa, Kahunadikayang antuk prajuru desa.

- (3) Krama Nyada, tan keni ayah-ayah lan papeson, nanging dados kaarahang pacang tedun ka desa, yan buat pacang mapapineh, mababawos ngawangun pangrancana salwire sane kabuatang antuk desa.
- (4) Krama desa ring dura desa, yogya ngaturang panahub ayah-ayahan ngemasa-masa senangken Anggara Kliwon Kulantir gung artha manut penghargaan beras 10 kg taler ngaturang dana pawangunan ritatkala desa mapawangun, ngayum wawangunan sane kadruwe antuk desa gung artha manut sakasidhan krama suka.
- (5) Krama tamyu Sane maagama hindu, yogya ngaturang penahub ke desa ngamasa-masa, satunggil pacaruan Tilem sasih kasanga gungartha manut penghargaan beras 10 kg, taler ngaturang dana pewangunan ritatkala desa mepawangun, ngayum wewangunan sane kadruwe antuk desa manut sakhasiddhan krama suka.
- (6) Krama Balu lanang keni ayahan lanang, paturunan sajaba bebanten, balu istri keni ayah-ayahan istri, paturunan rauhing bebanten, kawekas yan okane istri wiadin lanang sampun hantes maayahan patut krma balu punika maayahan matata turun cumek pateh ring krama desa ngarep
- (7) Krama sane tan maagama Hindu, tan sareng sapolikramaning agama Hindu, nanging tan wenang piwal ring awig-awig, paswaran desa, miwah pamutus pararem desa, sane ngindikang tata pawongan kalih palemahan.
- (8) Krama desa samiyan yogya saturut ring daging awig-awig desa Alasngandang, Paswara miwah pamutus pararem desa, ngutsahayang mangda kasiddhan mapikolih sakadi patitis tatujon desane kinucap ring hayun, tumus memangguhang kajagathitaning praja.
- (9) Krama desa sane pacang ngadol, ngantahang, maselangang, majegang, masewayang palemahan tegal, palasan, miwah sane sawosan sane magenah sajroning wawidangan desa pakraman alasngandang, hugi mangda polih palugrahan saking prajuru desa. yan tan polih palugrahan, yogya indike punika kahandegang.
- (10) Yan wenten sinalih tunggal sang sapa sira hugi magenah ring wawidangan desa pakraman Alasngandang, tan makrama desa ring desa Alasngandang, tan kalugra ngalaksanayang Panca Yadnya ring wawidangan desa Alasngandang, tan kalugra nganggen salwiring druwen desa.

Phala Pheksaning utawi Piolih-olihan Krama Desa Pakraman Alasngandang lwire :

- (1) Krama desa samiyan sejaba tamu, yogya polih pasubayan wiyadin pangoban saking desa, salwiring wyawaharanyu yogya kabawosang antuk prajuru desa, manut tata titining wyawahara.
- (2) Krama desa samiyan sejaba tamu, wenang nglaksanayang panca yadnya sajroning desa pakraman Alasngandang , manut desa kala patra, sastra agama, miwah nganutin sitan desa hinucap.
- (3) Krama desa ngarep mawed, krama desa ngarep, krama balu, wenang polih bebagian layuban aci-aci salwiripun, twas-twasan, miwah sawosan sane patut katiba ring krama desa manut panglokikan prajuru desa.
- (4) Mapawangkid, tan tedun maayahan, yogya saking panglokikan kalih palugrahan prajuru desa.

Palet 2
Indik Prajuru Desa
Pawos 9

- (1) Desa Pakraman Alasngandang kahemong antuk Prajuru Desa Lwire :
 - ha. Keliang desa
 - na. Pemaden Keliang desa
 - ca. Penyarikan
 - ra. Juru Raksa
 - ka. Petangan desa
- (2) Sane wenang kahadegang wiyadin kamanggehang dados prajuru desa Alasngandang lwire;
 - ha. Krama ngarep mawed, sane jenek magenah, makrama desa, matata turun sahurah-harih ring desa pakraman Alasngandang;
 - na. Tan cedangga, sekadi peceng, perot, cungh, lan sapanunggilanipun sane katandangin kabakta saking wawu embas ;
 - ca. Wikan mamawos kalih nyurat aksara bali utawi latin
 - ra. Mabukti tan nahen malaksana corah.

(3) Pidabdab ngadegang Prajuru desa :

- ha. Paruman utawi pasamuhan desa ngawentenang saseliran, pangawit paruman desa matujuang sang pacang kaadegang dados keliang desa, yan kantos lintangan ring adiri sane katuju antuk paruman desa, yoga pinilihan, sane akehan yoga turut.
- na. Mungwing ngadegang pamadhen keliang desa, panyarikan, juru raksa, petangan desa saking panyudin keliang desa, sane kabriyukin antuk paruman utawi pasamuhan desa, taler sane akehan yoga turut.
- ca. Lamine madeg dados prajuru desa, wantah limang warsa ngawit saking dina pawintenane, sajaba kapadgatatkalan minakadi sangkaning wenten wyawahara.
- ra. Yan Sang sampun nahen madeg pinaka prajuru desa, wenang kasudi malih manut kadi dresta.
- ka. Yan wenten sinalih tunggal piwal kalaning kasudi antuk paruman desa sang piwal punika wenang katiwakin panglokika, yan tan manut paksanya, kabawosan antuk paruman desa, yan jati tuhu paksannya, paruman desa wenang nyudi sane sawosan.
- da. Prajuru desa patut mewinten majuaya-jaya ring pura Puseh desa pakraman Alasngandang, mungwing dewasa pawintenan manut pamutus pasangkepan desa ritakala ngadegang prajuru desa hinucap.

Pawos 10

Swadharmaning Prajuru desa :

- (1) Midabdabin desa, krama desa, pacang ngupadi kajagadhitan sekala niskala, maka darsana awig-awig desa, paswaran desa, pamutus pararem desa, nganutin sastra Agama Hindu, minakadi uger-uger nagara ;
- (2) Ngarancana salwiring utsahan desa kaungkur, minakadi ngarancana salwiring sane nyandang pacang wangunang, sane patut hayum, manut lokika, desa kala patra. sane mabuwat, mangda kasidan polih palugrahan guru wisesa;
- (3) Mamawosin salwiring wyawahara sane wetu sajroning desa pakraman Alasngandang, niwakang tetimbang utawi pemutus bebawos sane yoga keputusang sajroning desa pakraman. yan tan kasiddhan kabawosan ring desa, prajuru desa mituduhang mangda ngaturang ring guru wisesa mangda kabawosan ;

- (4) Mratyaksa, nulingayang saparipolah prajuru desa, lwire : Kliyang banjar, Kliyang tempek, Kliyang pemaksan, Pemangku-pemangku desa, minakadi sane siosan sane wenten sajroning wawengkon Desa Pakraman Alasngandang ;
- (5) Midabdabin salwiring pemargin haci-haci ring wawidangan desa pakraman Alasngandang, taler nulingayang krama desa indike ngalaksanayang Panca Yadnya.
- (6) Prajuru Desa wenang, nyanggra salwiring pituduh, minakadi saraja karya saking Guru Wisesa, werat utawi ringan, sane yoga katiwak ring desa pakraman.
- (7) Pinaka duta pacang matemuang bebawos ring sang sapisira hugi, yan paindikan punika kapineh nyandang pacang marginin ;
- (8) Wenang ngewangunang langlang desa, sane patut ngalanglangin seraja karyan desa, nulinga katreptian sawawengkon desa pakraman Alasngandang ;
- (9) Wenang ngawangunang sekeha-sekeha sawosan, sane pacang ngarombo swadarma prajuru desa sane kabuwatang.

Pawos 11

Phala Peksaning utawi pioli-olihan Prajuru Desa :

- (1) Luput rarampen rikala ngaci ring kahyangan tiga miwah kahyangan desa
- (2) Polih twas-twasan atanding, sajaba duman krama
- (3) Upon pacatu utawi palaba tegal
- (4) Wenang polih babagian pasolasan saking artha bhrana pioli-poli guna kayan desa sane ngranjing ka Desa Alasngandang saking rahayu manut pamutus pararem
- (5) Wenang polih pangelad lwire :
 - ha. Yan wusan sangkaning rahayu patut polih patulung pangelad saking desa manut pamutus pararem kala punika
 - na. Yan sajroning kari madeg dados prajuru desa seda, pangelad kakaryaning antuk desa
- (6) Miwah pioli-oli sane sawosan manut pamutus pararem

Pawos 12

Prajuru Desa, kagentosin utawi husan, majalaran antuk :

- (1) Seda;

- (3) Mapinunas sangkaning rahayu, saha polih lugraha saking paruman desa;
- (4) Tutug sengker pangadage;
- (5) Sangkaning kahusanang antuk paruman desa utawi pasamuhan desa majalaran antuk wyawahara.

Palet 3

Indik Sangkepan utawi Paruman, miwah Pasamuhan

Pawos 13

Mungging sangkepan utawi paruman minakadi pasamuhan sajroning wawengkon desa pakraman Alasngandang, kadi ring sor puniki :

- (1) Sangkepan utawi paruman desa ngasasih, satunggil Budha Kliwon magenah ring pura Puseh, sane wenang nedunin sangkepan punika lwire : prajuru desa, pamangku desa, kliang-kliang tempek, krama desa minakadi sang sapa sirahugi sane kabuatang antuk desa, maka manggalaning mababawosan jeroning sangkepan utawi paruman manggeh kliang desa wiadin salah sinunggil prajuru desa saking palugrahan kliang desa.
- (2) Sangkepan utawi paruman prajuru desa, kawentenang patgatakala manut kabuatang desa magenah ring Pura Puseh Alasngandang
- (3) Sane patut nedunin sangkepan utawi paruman Prajuru desa punika lwire : Prajuru desa, Pamangku desa, minakadi sang sapa sirahugi sane kabuatang antuk prajuru desa.
- (4) Pasamuhan Desa Alasngandang kawentenang patgatakala, sasor ipun ngamasa-masa magenah ring pura Puseh Alasngandang.
Sang yoga nedunin pasamuhan desa punika, pingajeng sang patut sareng sajroning sangkepan desa, saha krama desa maka sami
- (5) Sangkepan Banjar, pamaksan pura, sekeha subak, miwah sekeha-sekeha sawosan, sane wenten sajroning Desa Pakraman Alasngandang kawentenang manut awig-awig, paswarannyane sowang-sowang, nanghing hugi tan sinarengan ring sangkepan desa minakadi pasangkepan prajuru desa.
- (6) Sangkepan utawi paruman desa patgatakala manut sakabuatan desa

Tata Kramaning Sangkepan utawi Paruman, miwah pasamuhan :

- (1) Saya patut makta canang miwah cane, tegep eteh-ete pasayaan, manut pagilih urak.
- (2) Yan kapatut pacang nganggen bebanten sakabuatan, prajuru desa, yogya mituduhang mangda cumawis, saha nyuksrahang pedagingan ring sang kapituduh makarya banten ika.
- (3) Saya wenang nepek tengeran sapisan sadurung ngawitin sangkep ngararis ngembakang sengseng janggi, ngararis haturan punika kaantebang mabriyuk muspa sareng sami ngararis mababawosan kantos puput
- (4) Babawosan sajroning sangkepan utawi paruman minakadi pasamuhan, hugi ngupadi karahayon jagat, minakadi ngerajegang kamuruban Sang Hyang Widi, majalaran bhawa laksana manut catur dresta lwir ipun : sastra dresta, kuna dresta, desa dresta miwah loka dresta.
- (5) Yan wenten sinalih tunggal ngatengahang babawos, jroning sangkepan utawi paruman minakadi pasamuhan, yogya kadamyakang. Yan nyandang bawosin, yogya rinawosan. Yan tan nyandang bawosin, hantukang ring sang ngamimitin.
- (6) Sane kinucap pamutus babawos, wiyadin paswara jroning sangkepan paruman minakadi pasamuhan, yan briyuk sapanggul hanut sang nangkepin, yan tan sapunika, asing akehan wenang turut manut panglokika. Pamutus babawos yogya kalekitayang, kalaksanayang manut hanggeran ipun.
- (7) Yan tan puput babawose sajroning sangkepan kantos ping tiga sangkepane, patut katengahang sajroning pasamuhan, pamutus babawos sajroning pasamuhan pinaka pamutus pamekas.
- (8) Sangkepan punika kabawos sampun puput, yan sampun keliang desa mitegesang daging-daging sane sampun kacumpuhin ring krama desa, saha sampun kabacak.

Palet 4

Indik Kulkul

Pawos 15

- (1) Sajroning Wawengkon Desa Alasngandang, wenten bebacakan kulkul, kadi ring sor puniki :
ha. Kulkul desa;

- na. Kukul Tempekan;
 ca. Kukul sekeha-sekeha.
- (2) Mungging suaran kukul punika mangda mabina-binayan sawiji soang, manut sor singgih, yan wenten suaran kukul patch, karun wiyadin sawer, mangda kapastika salah sawiji antuk sang madruwe.
- (3) Nepek kukul manut Tri Brata sandhi ; dharma, sima, laksana. tegesipun :
 ha. Dharma : swaran kukul make cihna wiyadin tatenger upacara Agama wiyadin Yadnya.
 na. Sima : swaran kukul make cihna wiyadin tatenger Panca Bhaya.
 ca. Laksana : swaran kukul maka cihna wiyadin tatenger patedunan.
- (4) Indik tetepekan kukul manut pasobhaya, kuna dresta, minakadi paswara.
- (5) Hunggwan Nepek Kukul :
 ha. Yan nepek kukul tatenger patedunan, hugi kukul sane kadruwe antuk krama, sane pacang tedun, katepek antuk sang patut ngukulang.
 na. Yan nepek kukul tatenger panca-bhaya. Wenang sahunggwan-hunggwan, asing nampek genahe. Wenang katepek antuk sang rihinan manggihin bhaya punika, minakadi sangkaning patuduh sang ngawiwenangang.
 ca. Yan nepek kukul tatenger upacara agama, Dewa Yadnya, Bhuta Yadnya, Manusa Yadnya, Pitra Yadnya, wenang kukul sane wenten ring swang-swang genah upacarane. Yan nyelang kukul sawosan patut wenten palugrahan sang ngawiwenangang.
 ra. Yan kalaning ngalungayang Bhatara, Mendak Bhatara, Bhatara turun kabeh, kalaning pacaruwan desa, sami kulkule sajroning desa, dados swarayang, tatepekan manut krama.
 ka. Yan wenten sinalih tunggal mamurug, nepek kukul tan manut krama, yogya kabawosan antuk prajuru desa, katiwakan panglokika, saha pamidandha manut paswara.

Palet 5

Padruweyan Desa Pakraman Alasngandang

Pawos 16

Sane kadruwe antuk Desa Pakraman Alasngandang Iwire :

- (1) Pura Kahyangan Tiga :
 - ha. Pura Puseh;
 - na. Pura Bale Agung;
 - ca. Pura Dalem miwah Prajapati
- (2) Pura Kahyangan Desa Iwire :
 - ha. Pura Dukuh
 - na. Pura Ulun Suwi
 - ca. Pasucian Ida Bhatara magenah ring getas desa Pempatan
- (3) Bale Desa
- (4) Tegak Druwen Desa malinggah 3,2 hektar
- (5) Tanah ayahan desa malinggah 150 hektar, minakadi tanah-tanah sawosan sane wenten jroning wawidangan desa Alasngandang
- (6) Setra pakraman apalebahan, minakadi setra pangilang-ilangan
- (7) Palaba pura malinggah 7 hektar, nunggu 50 are
- (8) Gong abarung
- (9) Lekita-lekita Iwire : pipil krama, awig-awig, paswara, miwah pamutus pararem desa
- (10) Ilen-ilen wali pura Iwire : rejang , pendet
- (11) Pralingghan Ida Bhatara
- (12) Tatentenan
- (13) Lembaga Perkreditan Desa miwah CBD
- (14) Palemahan sane kahanggen karang pomahan, telajakan karang, margi, rorong-rorong, sajroning desa Alasngandang

Pawos 17

Pioli-oli Desa Pakraman Alasngandang :

- (1) Pamupun tanah palaba pura, minakadi tegak druwen desa sane kagamel antuk krama desa sowang-sowang,
- (2) Urunan, panahub, pakenin-kenin pakaryan krama desa,
- (3) Haturan, dana punia,
- (4) Tiga sana tanah habutan, tanah ayahan desa
- (5) Pioli-oli saking LPD, miwah CBD,

- (6) Prolih-olih saking usaha, guna kayan krama desa, minakadi sawosan saking patut rahayu.

Palet 6

Laluputan

Pawos 18

- (1) Luput punika mapiteges nenten keni rarampen utawi raramon lwire : ron, busung, saang, klangсах, tiing, miwah babanten sane dados hemponan krama desa sareng sami
- (2) Krama desa pakraman Alasngandang sane luput lwire :
- ha. Prajuru desa,
 - na. Pemangku desa,
 - ca. Sang sapasira hugi sane kapineh antuk desa patut nyandang polih leluputan, manut paswara.

Palet 7

Dedosan Patedunan

Pawos 19

Dedosan patedunan, sangkepan. Tedun makarya miwah sane sawosan, nganutang sukreta sowang-sowang lwire :

- (1) Yan desa pakraman madruwe patedunane, yogya nganggen sukretan desa, sane kagaduh antuk desa, dadosan ngranjing ka desa.
- (2) Yan patedunan pacang makarya ngaryaning karyan desa, dadosan ipun ngaranjing ka desa
- (3) Yan patedunan sajroning tempek ngaryaning karyan tempek, dadosane ngaranjing ka tempek sowang-sowang
- (4) Yan subak madruwe patedunane yogya nganggen huger sukretan subak, sane sampun kagaduh antuk sekeha subak, dadosane ngranjing ka subak.
- (5) Yan sekeha-sekeha sawosan madruwe patedunane, yogya ngangge huger sekeha sowang-sowang dedadosane ngranjing ka sekeha.
- (6) Yan wenten krama sinalih tunggal tan tinut ring tatepasan miwah dadosan punika, wenang, babawose katengahang ka desa, prajuru desa yogya mamawosin.

(7) Agung alit dadosane, sane katerapang ring wawidangan desa Alasngandang ring desa, ring banjar-banjar, ring tempek-tempek, ring sekeha subak, minakadi sekeha-sekeha sawosan, mungguh sajeroning paswaranya sowang-sowang, saha maceciren palugrahan prajuru desa pakraman Alasngandang

Palet 8

Indik Bhaya

Pawos 20

- (1) Sane kinucap Panca-bhaya, lwiripun : jiwa bhaya, agni bhaya, toya bhaya, artha bhaya, bhayu bhaya.
- (2) Salwiring bhaya wenang gejerang antuk swaran kulkul.
- (3) Sang sapa sira hugi krama desa sane manggihin, wiyadin huning ring panangkaning bhaya, ring kang katiben bhaya, wenang ngejerang nepek kulkul manut indik kakulkulan bhaya, raris damyakang ring wedesa.
- (4) Ri kala wenten swaran kulkul bulus tatenger bhaya, krama desa patut yatna, sayaga, saha sregep ngamong prabot wiyadin gagawan sowang-sowang.
- (5) Yan sampun tatas ring bhaya punika, krama desa patut matetlung nambakin, wiyadin ngamesehin baya punika manut hunggwan, kalih manut patuduh sang yogya ngawiwenang.
- (6) Sang sapa sira hugi tan kawasa majajabur ri kalaning desa, krama desa, katiben bhaya. Yan wenten sinalih tunggal kacirenan mamurug, yogya katengahang ka desa, wiyadin katur ring sang amawa bhumi, mangda kabawosan.
- (7) Yan pinganan bhaya punika sampun kapineh nahnah, tan pacang nyengkalen, wenang kacihnayang antuk swaran kulkul lambat atuludan, wiyadin pasiyar saking sang ngawiwenang.

Palet 9

Indik Rarampagan

Pawos 21

Sane wenang rampag minakadi hunggwan kalih pidabdab ngarampag, mungguh sajeroning paswaran desa Alasngandang, taler manut ring dresta kuna.

Palet 10
Indik Panyanggran Desa
Pawos 22

- (1) Seraja karya desa kasanggra antuk krama desa, kahunadikayang antuk prajuru desa, karemba antuk kliang-kliang tempek
- (2) Yan wenten krama desa ngawangun yadnya suka duka, kengin nunas panyanggran tempek minakadi panyanggran desa.

CATURTAS SARGGAH
Sukreta Tata Palemahan
Palet 1
Indik Tegal Lan Karang
Pawos 23

- (1) Palemahan Desa Pakraman Alasngandang, mahuger antuk Tri Mandhala , lwire :
ha. Uthama mandhala : palemahan sane kaanggen karang pura, wiyadin parhyangan
na. Madya mandhala : palemahan sane kaanggen karang pomahan, genah
wawangunan, sekadi : banjar, sekolah, kantor, rumah sakit miwah sane sawosan.
ca. Nista mandhala, palemahan sane kaanggen setra, margi, rurung, papunduk,
telajakan karang, miwah sane sawosan. Sahanan palemahan sane wenten ring
wawengkon Desa Pakraman Alasngandang, yogya mangde madruwe bebaledan
wiyadin wates sane pasti.
- (2) Sakancan palemahan sane wenten ring wawengkon desa pakraman Alasngandang patut
madruwe bebaledan wiadin wates sane pastika
- (3) Sahanan palemahan punika, hugi mangda madruwe margi, rurung, papunduk, sane
dados hentsin.
- (4) Yan wenten pakarangan pura, pomahan, tegal, miwah palemahan sawosan kabebeng
tan madruwe margi, rurung, miwah papunduk, sang madruwe patut ngatengahang
babawose ka Desa. Prajuru desa yogya negdeg, ngutsahayang mangda polih margi

malarapan sangkaning sami suka. Yan patut matumbas, manut pangargan tanah sane kamanggehang antuk sang mawa rat, sami katahur antuk sang mamuatang.

- (5) Yan Desa pacang ngalinggahang margi, rurung minakadi makarya margi, rurung desa saking sampun hingkup paswaran Desa, yan nganggen tegal, miwah palemahan sawosan wenang tan nawur penghargaan tanah punika, taler yan madaging tetanduran desa tan nawur prabeya tatanduran punika, nanghing yan madaging papayon, wewangunan salwire, desa patut ngicen prabeya agung alit manut pamutus parembug Desa kala punika.
- (6) Sahaning karang pomahan hugi mangda masengker. Pidabdad nyengker, magaleng ka dulu. Panyengker sane sisi kangin, miwah sisi kaler, patut kakaryanin antuk sang ngenahin karang punika. Sajaba karang ngele, wiyadin lingkehin rurung, palemahan suwung.
- (7) Sang sapasira hugi ngenahain karang tegehan, patut naku, tegehe asukat natah dangsah, sane tebenan, wenang nyusunin tembok.
- (8) Telajakan karang patut kapiyara antuk sang ngenahin karang punika sowang-sowang, mangda mapikenoh tur kanten hasri.
- (9) Yan wenten sinalih tunggal nyadya nyaleksek wiyadin ngaleklek babaledan salwiring babaledan wiyadin wawatesan, lwire : babaledan wiyadin wates pura, karang pomahan, tegal, setra, jlingjing, margi, rurung, papunduk, miwah sane sawosan, yogya katiwakan dandha manut werat ringan kahiwangane, saha mahayu sane kaseleksek wiyadin kaleklek, kalih mrayascitta sakabwatan sane nyandang katibanan panyangaskara, indik negdeg wawatesan utawi babaledan manut dresta kuna.
- (10) Yan hana sinalih tunggal ngaletihin, ngarucakin, ngrobodin, ngararabin, palemahan liwaring pomahan padruweyan nyane, lwire : ngutang luu, bangkaan, miwah salwiripun, nyorongang babanyon, yogya katiwakan dandha gung artha manut paswara, tur mahayu sane kaletahan, karucakan, karobedan, raraban hinucap ring ajeng, saha mrayascitta sane nyandang keni panyangaskara.
- (11) Yan wenten anak ngenahin palemahan sajroning wawengkon desa pakraman Alasngandang tan tinut makrama desa nganutin Awig-awig miwah paswaran desa, tan kalugra nganggen salwiring padruweyan desa, tan kalugra ngalaksanayang panca yadnya sajroning desa Alasngandang. Yan tekaning kapatiyon dados sahubang utawi pendhem ring setra pangilang-ilangan, tan polih panyanggran tempek banjar minakadi panyanggran desa.

- (12) Yan wenten anak tan ma Agama Hindu ngenahin palemahan sajroning Desa Pakraman patut nganutin Paswaran Desa Pakraman Alasngandang.
- (13) Tanah ayahan desa dados adol ring prati sentana desa murwa sane mawilang 57 diri

Palet 2

Indik Kakayonan

Pawos 24

- (1) Ngawit nandur kakayonan tanem tuwuh, patut adepa agung ngajeroang saking wates, prade jantos ngaliwat wates carang ipun wenang kasepat gantungin
- (2) Tan kalugra nebtob, ngarebah wit-witan salwir ipun, ring palasan, pategalan, habing, tangkid, miwah genah sawosan sane kakeker antuk desa, yan wenten sinalih tunggal mamurug katiwakan dandha manut lokika, manut paswara tur taru sane karebah mantuk ka desa, sasampun polih palugrahan saking sang amawa rat.
- (3) Salwiring wit-witan sane sampun kacirenan wiyadin kasewenin antuk desa, pacang mangge mamapawangun ring desa, pradene punika ka rebah antuk sang madruwe, yoga sang madruwe katiwakang dandha, manut lokika, manut paswara, taru wiyadin wit-witan sane karebah mantuk ka desa, wiyadin ngetang pangarga.
- (4) Yan wenten wit-witan wiyadin kakayonan ngungkulin palemahan anak sawos, sane ngawinang tiyeb, tampyas, ngarobedin, asing kungkulan wenang ngetengahang ka desa, prajuru desa maritetes saha mituduhang sang madruwe mangda ngrancap, nebtob, wiyadin ngarebah. Yan kantos ping tiga pituduh desane tan kalingu, wenang katiwakan dandha sang anikel tuduh, gung artha manut paswara. Kakayonan punika prasiddha karebah antuk desa picundhangan.
- (5) Sang keni pamidhanda panyanggaskara saha prabeya manut pamutus pararem desa marep ring wawangunan sang karubuhin lwire :
- ha. Sang nruwenang wit sinanggeh mayanin, prade pungkut ngarubuhin wawangunan krama siosan
- na. Sang notor, munggul utawi ngarebah taru sane ngarubuhin wawangunan krama siosan
- (6) Tanem tuwuh miwah tatanduran sawosan jroning karang pomahan, tan kalugra tegeh ipun litangan ring jan palit solas, wiyadin limang meter. Bungkil ipun adepa agung, wiyadin kalih meter tengah, saking panyengkere ngajrowang. Yan mamurug, wenten

raris ngatengahang ka desa, yogya sang mamurug katiwakan dandha gung artha manut paswara, saha ngarebah, sajroning tigang rahina saking pamuput babawose.

- (7) Kakayonan jroning karang pomahan hugi mapyara mangda tan ngaletihin ngarobedin, mamayen karang sawosan, saking akah kantos dawunipun. Yan wenten mamurug, tan tulinga ring kakayonan duwe, wenten ngatengahang ka desa, Prajuru desa yogya maritetes, saha nepasin manut panglokika kalih paswaran desa.
- (8) Yan wenten taru mentik kantos ageng ring babaledan, wates, salwiring babaledan mwang wates, wenten ngatengahang ka desa, patut taru punika karebah, raris pinara tiga, apahtigayan mantuk ka desa sang madruwe babaledan apahtigayan sowang-sowang.
- (9) Yan wenten sinalih tunggal nundungin tanem tuwuh, kakayonan, sane kaswatah pacang mamayen, wenang kabawosang ring sang madruwe. Yan hakas sang madruwe, yogya katengahang ka desa. Prajuru desa negdeg tanem tuwuh wiyadin kakayonan punika. Yan manut panglokikan prajuru desa yogya tundungin, taler hakas sang madruwe, patut sepat gantungin. Yan jati kadi panywatahe, yogya sajroning tigang dina, karebah picundhangan. Sang madruwe katiwakan dandha gung artha manut paswara, dosane anikel tuduh. Yan tan yukti kadi panywatahe, sang ngatengahang katiwakan dandha gung artha manut paswara dosanne angadakaken nora, tanem tuwuh wiyadin kakayonan punika tan karebah.
- (10) Yan wenten sinalih tunggal nyadya nandur pijer, turus, salwiring tanem tuwuh wiyadin kakayonan sane pacang dados ageng, nesek ring babaledan, ring wates, papunduk, hugi mangda masupeksa ring Prajuru Desa, kalih ring panyanding sowang-sowang. Yan tan kalugra, tan kapisukayang, pradene wenten mamurug, yogya sang mamurug katiwakan dandha gung artha manut paswara, tur ngamademang tatandurane.
- (11) Yan wenten krama nandur pijer minakadi tatandur sakadi poh, cengkeh, juuk, salak, miwah sane sawosan sane tuwuhipun panjang sane ngawanang tanahe andog, ring tegal sasakapan, hugi mangda makarya pasobaya ring sang madruwe tegal hinucap. Yan durung pingenan mawoh tatanduran punika, durung nahen ngalopin wohipun pinih sor limang pelabuh, sejabe sangkaning kahiwangan penyakap, raris kajabutan, yogya sang madruwe tegal nahur panjala sa wit - sa wit, gung artha manut paswara.
- (12) Sang sapa sira hugi nyakap tegal, tan kawasa ngarebah tatanduran sane dados anggen lakar wawangunan, yan tan polih lugra saking sang madruwe tegal punika.

- (13) Yan wenten wit-witan sajeroning pategalan rebah antuk kapanca bhaya tan dados kajarahin antuk sang sapisira ugi, yen wenten mamurug keni pamidandha manut panglokika.
- (14) Tan dados marereh-rerehan salwire ring tegal tani druwe, tegal tan sasakapan druwe, yan tan kapisukayang, yan wenten mamurug, wenten raris ngatengahang ka desa, keni pamidandha manut panglokika.

Palet 3

Indik Wawangunan

Pawos 25

- (1) Sang sapa sira hugi krama desa, sawewengkon desa Alasngandang. yan pacang ngwangun panyengker karang pomahan, patut masupeksa ring panyandinge. Yan tan radin, yogya nunas degdegan ring Prajuru Desa. Prajuru desa negdeg saduhajeng ring sang mawicara.
- (2) Wawangunan ring palemahan pecak tegal, palemahan suwung, sane sampun masanggah pawon, palemahan punika prasidha kabawos karang pomahan, dwaning sampun katiwakan pangupakaran karang. Awanan patut madruwe rurung betel ka marggi agung, sukat dados pacang ngalintangang papaga, dwaning tan kapatut ngalintangang sawa ring cariik, tegal. Yan wenten mamurug, yogya prajuru desa niwakang tatepasan, mangda sang mamurug mrayascita palemahan hinucap sane kalintangang.
- (3) Yan tan masanggah panghuluning karang, kabawos akakubon. Tan yogya genah ngraksa sawa. Yan wenten mamurug, yogya katiwakan pamidandha mangda mrayascita palemahan punika.
- (4) Yan wenten sinalih tunggal sang sapisira hugi, pacang ngwangun wawangunan genah ngelaksanayang upacara Agama, lwire : Pura, Masjid, Gereja, Wihara, miwah ane sawosan, hugi mangda wenten lekita palugrahan Prajuru Desa, kalih lakita palugrahan Guru Wisesa. Yan wenten mamurug kadi kinucap ring hajeng, kabawos tan sida karya, tan wenang anggenen, tur wawangunan punika yogya wangdeyang .
- (5) Wawangunan jroning karang pomahan, hugi nganutin tri-mandhala. Utama mandhala, sanggar panghuluning karang, Madya mandhala, pagenahan mapumahan, Nista mandhala, ngaran lebu, jabayan.

- (6) Tan wenang ngungkulangi capcapan wawangunan kajroning karang pomahan sawosan tani druwe. Yan wenten mamurug, wenten ngatengahang ka desa, yogya Prajuru desa negdeg, saha nyipat gantungin. Yan jati lintang, sajroning salahe rahina saking puput babawose mangda sampun kapastika.
- (7) Tan wenang nganggen tembok umah wiyadin tembok panyengker tani druwe. Wenang ya kasambatsara antuk sang madruwe. Yan hakas tur mamurug sang kasambatsara, yogya katengahang ka desa, kabawosan antuk prajuru desa .
- (8) Sang sapa sira hugi pacang mapawangun nepi ring marggi agung, nepi ring rurung desa, yogya wenten lekita palugrahan saking prajuru desa, wiyadin lekita palugrahan sang amawa rat. Yan tan polih lekita palugrahan, padgatakala wawangunan punika dados katundungan tan ngetang prabeyan tatundungan.
- (9) Sang sapa sira hugi krama desa ngawengku karang pomahan, yogya hurati myara kahasriyan lebuhi pakarangannya, rurung pentasan pinih sor asukat karangnya ngalanjur.
- (10) Sang sapa sira hugi pacang ngawangun Hotel, miwah sapanunggalan ipun ring wawidangan desa Alasngandang patut mewaneng pinih sor, satus depeha saking pura-pura sane wenten sajeroning desa. Saha hugi mangda wenten lekita pasobaya kalih lekita palugrahan saking prajuru desa kalih sang amawarat.
- (11) Sang sapa sira hugi nagwit pacang makarya wawangunan ring wawidangan desa Alasngandang, yan kantos pacang ngamademang tetanduran tanem tuwuh sane kapineh ngalikadin mangda kawentenang karembug ring sang madruwe minakadi nawur panebas ipun.

Palet 4

Indik Wawalungan

Pawos 26

- (1) Sane kinucap wawalungan, sakancan buron suku pat sane nyadya kapiyara, sakadi bawi, banteng, kambing, kebo, misa, jaran, miwah sapanunggilan ipun. Taler watek makampid, sane nyadya kapyara, sakadi ayam, itik, angsa, dolong, miwah sabacakan ipun.
- (2) Sang sapa sira hugi krama desa sane myara wawalungan suku pat, sajaba hasu, tan wenang ngalumar. Sane patut matlusuk, mangda matlusuk. sane tan patut matlusuk,

mangda mategul bawong. Sane patut maglogor, makandang, hugi mangda maglogor wiyadin makandang. Mangda tan ngarucakin, ngaletihin palemahan tani druwe, miwah mamayen krama desa, jana pada. Yan hasu mangda mabelat, lwire makalung bawong, make cihna wenten sane myara.

- (3) Sang sapa sira hugi krama desa, myara watek suku kalih, watek makampid, yatnain hugi, mangda tan banget ngarucakin, ngaletihin, palemahan, pomahan, tatanduran druwen anak sawos.
- (4) Tan wenang ngangonang, negulang, hingon-ingon ubuh-ubuhan, ring palemahan tan druwe minakadi tan sasakapan druwe, yan tan kapisukayang. Sang madruwe palemahan, Prajuru Desa, Langlang desa, Kliyang-kliyang, asing mamanggihin, wenang nyambatsara sang madruwe wawalungan ika. Yan hakas sang kasambatsara, wawalungan ika wenang taban. Prajuru desa yogya niwakang pamidandha, manut lokika, gung artha manut paswara.
- (5) Tan wenang ngangonang, negulang ubuh-ubuhan, ring palemahan karang pura, kahyangan salwir ipun, minakadi setra, rurung, papunduk, margi, tlajakan karang, palemahan sane kapingitang, karang suwung, miwah sabacakan ipun. Yan wenten mamurug, Prajuru desa, langlang desa, kliyang-kliyang tempek banjar, prajuru desa sinalih tunggal, asing mamanggihin, wenang nyambatsara, saha naban wawaluingan ika. Katengahang ka desa, katiwakan dandha gung artha manut paswara, saha mahayu yan wenten karusak, tur mrayascita palemahan ika sane nyandang prayascitta manut panglokika.
- (6) Yan wenten maubuh-ubuhan sajroning karang pomahan, hugi tlajan mratyaksayang kandang ipun, mangda tan ngawetuwang bhaya, Panyungkan. Taler mangda hapik guritan, siksa, mangda tan kantos ngaletihin, ngarobedin, nyerobohin karang pomahan wiyadin palemahan panyandinge. Yan wenten mamurug, tan priksa ring hingon-hingon, miwah kandang ipun, wenang panyandinge nyambatsara, wenang katengahang ka desa, prajuru desa nepasin. Wenang katiwakan dandha manut panglokika kalih paswaran desa.
- (7) Sang sapa sira hugi krama desa, ngawangunang kandang wawalungan, buwat adol antuk, yan kandang ayam, itik, miwah sapanunggilan ipun, buwat naluhang, miwah adol antuk .Dagingan satus ukud. Yan kandang wawalungan suku pat lwire kandang banteng dagingan petang ukud, kandang babi, kambing dagingan adase ukud, sowang-sowang, ika wenang jroning karang pomahan. Yan lintangan ring punika daging

kandange, tan wenang wangunang jroning karang pomahan, yogya kawangunang ring palemahan sane mawaneng sa sor ipun satus depa saking palemahan karang pomahan, sekolah, kantor, Pura Kahyangan, minakadi genah sane kakeker wiyadin kapingitang antuk Desa Pakraman Alasngandang. Tur mangda maduwe lekita palugrahan saking sang amawa bhumi.

- (8) Yan wenten wawalungan ngarucakin, ngerug tatanduran, wenang taban. Sang madruwe tatanduran ngatengahang ka desa pramangkin, kabawosan antuk Prajuru desa, saha katiwakan dandha manut lokika paswaran desa.
- (9) Yan godel banteng, godel kebo, godel misa, durung matlusuk, godel jaran, kambing miwah sabacakan ipun durung hantes mategul, yogya salabarang ring sang madruwe.
- (10) Yan bebek, angsa, dolong miwah sapanunggilan ipun, ngarucakin tatanduran, taler wenang taban. Indike naban, mangda mesaksi, saha kasupeksayang ka desa pramangkin, prajuru desa yogya mamaosin, niwakang pamidandha manut panglokika.
- (11) Yan wenten wawalungan ngeleb, mamegat ngaranjingin palemahan pura, kahyangan, setra, karang pomahan, miwah sane sawosan, lokikanen juge. Yan tan nyadya kalebang tan wenang taban.
- (12) Sang sapisira hugi tan kalugra maburu, medil miwah nyaring paksi sajroning desa Alasngandang, sajaba buron sane kabawos merana, yan wenten mamurug wenang katengahang ka desa pramangkin, kabawosan antuk prajuru desa saha katiwakin dandha manut panglokika, kalih paswaran desa.
- (13) Sekancan dadandhan, dadosan, sane munggah ring ajeng, sami mantuk ka desa.

**PANCAMAS SARGAH
SUKERTA TATA AGAMA**

Palet 1

Indik Dewa Yadnya

Kaping 1

Indik Kahyangan

Pawos 27

- (1) Pura Puseh, pura Bale Agung, pura Dalem miwah Prajapati, pura Dukuh, miwah pura Ulun Suwi, kahemponin antuk krama desa Ngarep Mawed. miwah krama desa Ngarep.

- (2) Pura-pura Kahyangan sane sawosan ring sane kinucap ring hayun, papayon kalih pangaci-aci kahemponin antuk krama pamaksan pura sane nyungsung Bhatara ring pura Kahyangan punika sowang-sowang.
- (3) Mungging pasucian Bhatara, papayon kalih paaci-aci kahemponin antuk krama desa ngarep mawed miwah krama desa ngarep.
- (4) Yan wenten karecehan, wicara, sajroning pamaksan pura, pasucian bhatara, subak, sinalih tunggal, wenang katengahang ka desa, prajuru desa mamawosin, nyahsahang, nepasin wicarane, mangda kasidhan mawali landuh jatimula.
- (5) Tan wenang nguwah nguwuhin wawilangan palinggih bhatara, sane sampun wenten ring pura kahyangan sowang-sowang, mangda kantun manggeh kadi kuna.
- (6) Yan wenten pura kahyangan sinalih tunggal, reneng pengaci-acinya, kantos ka dasa warsan, yoga prajuru desa mamawosin, maritetes, ngutsahayang mangda kasiddhan mawali kadi jatimula. Nanging prade tan kasiddhan, majalaran antuk pamutus pasamuahan desa, prasiddha desa ngawangunang pangupakara mralina pura punika, mangda tan karanjangan kaumahin antuk Ki Bhuta Kubandha.

Kaping 2

Indik Pangaci-aci

Pawos 28

- (1) Indik pangaci-aci ring pura kahyangan sane wenten sajroning wawengkon desa pakraman Alasngandang, kahemongin antuk krama desa, manut hemponan wiyadin pamaksan sowang-sowang, sajaba kahempon antuk krama desa ngarep mawed miwah krama desa ngarep, Swang - swang Pura madruwe gagaduhan, pinaka huger pangaci-aci, miwah babanten.
- (2) Sane yoga muput haci-aci ring pura panyungsungan desa wantah pamangku desa sane wenten sajroning pura punika, sajawaning pangaci-aci sakadi mamungkah. ngenteg linggih miwah sapanunggalan ipun yoga kapuput antuk Ida Sulinggih.
- (3) Yan wenten sinalih tunggal pura durung madruwe pamangku, utawi pemangkunc kapyalang, dados nuhur sinalih tunggal pamangku kahyangan desa, prade taler tan mrasiddhayang patut nuhur Ida Sulinggih.
- (4) Pamangku desa punika wantah pamangku Pura Puseh, Pura Dalem, Pura Desa, sane wenten sajroning desa pakraman Alasngandang, kalugra nganteb banten pangodal

minakadi sane sawosan ring pura-pura sawewengkon Desa Pakraman Alasngandang sane mamuwatang, taler manut kawenangan Pamangku.

- (5) Ritatkala desa ngawangun karya ageng, mwang karya-karya siosan ring pura Puseh, pura Bale Agung miwah pura Dalem, desa dados nyarad pemangku-pemangku Kahyangan sane wenten ring wawengkon desa pakraman Alasngandang pacang ngarombo pemangku desa

Pawos 29

Indik pangaci-aci ring pura Panti, Pamrajan, Pahibon, dadya mwang pura-pura sajabana hemponan desa sane wenten sajeroning desa pakraman Alasngandang, punika kahamongin antuk krama desa sajroning sekeha dadya, pamrajan, manut sima drestanya sowang, tan singsal ring ucaping sastra agama hindu.

Pawos 30

- (1) Aci-aci, piodalan, pangusabhan minakadi pasegeh ring pura Kahyangan Tiga miwah Kahyangan Desa Iwire :
- ha. Pura Puseh, ritatkala Purnama Kapat
 - na. Pura Desa utawi pura Bale Agung ritatkala Purnama Kapat
 - ca. Pura Dalem miwah Prajapati ritatkala Anggara Kliwon wuku Kulantir, ngenem sasih
 - ra. Pura Dukuh, rikala Anggara Kliwon wuku Prangbakat, ngenem sasih
 - ka. Pura Ulun Suwi rikala Purnama Sasih Kanem, ngenem sasih
- (2) Pangaci-aci sawosan Iwire :
- ha. Mungkah utawi ngendagin, rikala dina kajeng umanis sasih kasa ngamasa-masa
 - na. Pangaci-aci ring pasucian Bhatara utawi aci pamagpag toya, kala dina panglong ping pisan sasih kapat
 - ca. Nga Hyang-hyangang Ida Bhatara Gede miwah Ida Bhatara Nini, satunggil dana Kajeng Kliwon uwudan sasih kawulu nyatur desa.

Pawos 31

- (1) Aci-aci, piodalan, pangusabhan ring pura Kahyangan Tiga miwah Kahyangan Desa sajroning desa pakraman Alasngandang kasanggara antuk krama desa manut hemponan
- (2) Luwiring babanten, minakadi heed upacara, manut gegaduhan dresta kuna sowang-sowang pura.
- (3) Padagingan pacang aci-aci :
 - ha. Hupon-hupon tanah palaba pura
 - na. Piturunan lan wawijilan krama desa
 - ca. Patigasana abutan tanah ayahan desa
 - ra. Pioli-oli pagunakayan krama desa.
 - ka. Haturan-haturan sangkaning krama suka nirmala.
- (4) Pasegeh tunggil kajeng kliwon, purnama, tilem kasanggara antuk pamangku sowang-sowang, padagingan saking druwen pura, pamaksan, kaantebang antuk pamangku sowang-sowang
- (5) Ri kala kabrebehan jagate, kageringan, katiben panca bhaya, pinganan tan mresiddhayang ngaturang haci kadi patute, yogya prajuru desa miwah pemangku desa, ngaturang piuning ring Bhatara, masadhana babanten padhatengan, pacanangan, maka cihna tan pegat haci-acine. Ri wus mawali degdeg jagate, patut ngawangunang upacara Bhatara Turun Kabeh, masisirih makakobok ka Segara Giri.
- (6) Yan ri tatkala mamahayu, ngayum papayon, ring pura-pura kahyangan, pinganan tan puput kala dinaning piodalan, pangacine wenang rangkadang, nanging padhatengan, pacanangan, tan dados pegatang. Ri wus puput masasapuh salwire, malih mawali kadi kuna.

Kaping 3

Indik Pamangku

Pawos 32

- (1) Ring sowang-sowang pura kahyangan patut ngadegang pemangku
- (2) Pidabdab ngadegang pemangku sinalih tunggil :
 - ha. Ngambil saking saserod sentana wiadin katurunan
 - na. Saking pamuwus sasemburan wiyadin nyanjan, pinih alit kantos ping tiga

- ca. Sangkaning kajujuh saha kabriyukin antuk krama desa pakraman Alasngandang.
- 3) Sang tan wenang kahadegang dados pamangku lwire :
- ha. Cedangga lwire : peceng, perot, cungh lan sapenunggalanipun.
- na. Mabukti sungkan rahat.
- ca. Mabukti nahen ngarug sasana, minakadi malaksana corah.
- 4) Sang sapasira hugi pinaka jan banggul utawi pamangku ring Pura Kahyangan Tiga miwah Kahyangan Desa ring desa pakraman Alasngandang, mangda pageh ngamel kalih ngalaksanayang sasanan pamangku.
- 5) Sang sapasira hugi krama desa, sangkaning saseroth, sangkaning kasenengan antuk bhataha polih pamawus ring sasemburan, minakadi kajujuh kabriyukin antuk krama desa, pucung kaanggen pamangku, yan kari alaki rabi yogya lanang istri mawinten.
- 6) Sang kasudi pucung kaanggen pamangku, patut mawinten ring pura genabe dados jan banggul. Munggrwing prabeya kasandangin antuk pamaksan pura sowang-sowang, yan pamangku desa kasandangin antuk krama desa.
- 7) Pamangku patut madruwe hamongan pura sowang-sowang, yan tan madruwe hamongan pura, prasidha tan kalugra, ngantebang babanten ring pura salwire.
- 8) Sinalih tunggal pamangku kahyangan tiga miwah kahyangan desa yan katekan pati, yogya tiniwakem. Patut polih patulung prabeya atitiwa, saking desa, yan pamangku tawonan, saking krama pura sowang-sowang, agung alit patulunge nganutin pamutus bahuwon sajroning parareman kala punika.
- 9) Yan pamangku was tiniwakem, patut kakaryaning pangelad utawi sangauk, wyadin papegatan antuk desa utawi krama pura hirucap. Punika yan pamangkune kari rajeg ngamong swadharmaning pamangku kantos hantaka.
- 10) Piodib-odib pamangku lwire :
- ha. Pangolem
- na. Muponin tegal palaba utawi tegal buktin pamangku
- ca. Penyolongan saking sarin carang apah tigaan.
- ra. Luput rarampen utawi raramon, sajroning kantung pinaka krama ngarep
- 11) Swadharmaning pamangku lwire :
- ha. Ngenterang upacara pujawali utawi piodalan miwah pangusabhan ring pura sowang-sowang sadurung upacara mamargi

na. Prade salah sinunggil pamangku kahyangan tiga utawi kahyangan desa kapiyang utawi cuntaka kengin nuwur pamangku desa sane wenten sajroning desa Alasngandang saking palugrahan prajuru desa

(12) Pamangku kagentosin majalaran antuk :

ha. Mapinunas mararyan, saking patut pinunase, nanghing tan kari ngalaksanayang dharmaning pamangku. Kawekas kalaning seda, tan polih patulung prabeya atitiwa.

na. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadayang antuk krama pura, wiyadin desa. Kawekas kalaning seda, patut polih patulung prabeya patitiwan.

ca. Sangkaning kahusanang, majalaran antuk malaksana mamurug sasanan pamangku. kawekas kalaning seda tan polih patulung prabeya atitiwa.

Kaping 4

Indik Sukretan Pura Kahyangan

Pawos 33

- (1) Ri kalaning maturan hamung pamangku ring kayangan punika sane dados munggal tedun ring palinggih-palinggih pura kahyangan hinucap, minakadi sang sampun polih lugraha saking pamangku pura hinucap minakadi lugraha prajuru desa. Yan wenten mamurug, katiwakan dandha mrayascitta palinggih punika.
- (2) Pamangku sane patut ngantebang babanten ring pura, sinalih tunggal wantah pamangku sane kadruwe antuk pura punika. Yan nenten wenten pamangku ring pura punika, utawi kapyalang, patut nuwur Ida Sulinggih.
- (3) Tan kalugra mamisuh, mababawos pati kacuh, nguman-nguman ring sajroning kahyangan wiadin pura, yan wenten macihna mamurug keni danda tur mrayascita pura manut pamutus pararem desa
- (4) Tan Kalugra masumpah, ma coran, sajroning pura Kahyangan sinalih tunggal, sajaba sangkaning wicaran pura hinucap, taler saking pabuwat krama pamaksan pura, utawi pabuwat Krama Desa sane ngempon pura punika.
- (5) Tan kalugra wak capala, hasta capala, pada capala, miwah sapanunggilanipun, sajroning pura kahyangan. Yan macihna wenten mamurug, wenten raris ngatengahang ka desa, yogya tiniwakan dandha pamarisuddhan kahyangan.

- (6) Tan kalugra malaksana kantos ngawetuwang biota ring pura kahyangan. Yan wenten mamurug, sang kapineh sampun nama wirang kantos maywadi ring pura, yogya tiniwakan dandha gung artha manut pangarggan beras adasa kg. kang sawiji, saha marisudha kahyangan punika.
- (7) Sang sapisira hugi kacuntakan, salwiring cuntaka, yan durung mabersih, tan kalugra ngaranjing ka pura kahyangan. Yan katenger wenten mamurug, yogya tiniwakan dandha marisuddha kahyangan punika.
- (8) Sedahan hengengan miwah sapanunggilan ipun tan kalugra maseha ring pura kahyangan sinalih tunggal. Yan wenten mamurug, yogya dandha gung artha manut paswara, saha ngawengdeyang maseha tur mrayascitta pura.
- (9) Tan kalugra ngawentenang kaklecan, jajuden, sajroning pura kahyangan. Yan wenten mamurug, sang ngalaksanayang katur ring sang amawa rat, tur kaklecan jajuden punika kawangdeyang, ring desa keni pamidanda manut pamutus pararem desa
- (10) Tan kalugra makta salwiring sane kasinanggih tan suci ngaranjing kajroning suter utawi panyenger Pura Kahyangan, yan wenten mamurug, yogya sang mamurug marisuddha pura punika.
- (11) Sang sapisira hugi rikalaning makemit, ring pura kahyangan, yan merem, tan kalugra madukan lanang istri, sajaba anak sane kapineh kari alit durung rumaja putra. Yan mamurug keni dandha manut pangarggan beras adasa kg sadiri-sadiri. tur mrayascitta pura punika.
- (12) Pamaksan sowang-sowang pura kahyangan sawewengkoning desa pakraman Alasngandang kalugra madruwe sukreta ndiri-ndiri, nanging tan dados singsal ring pasukretan desa pakraman Alasngandang.
- (13) Pura Kahyangan tan wenang anggen sajaba ngalaksanayang upacara Agama Hindu manut sastra agama ring Bali. Yan wenten mabhukti mamurug, sang malaksana kawangdeyang, tur pakardinyane kapuceh, saha sang ngalugrahin kadandha manut pangarggan beras adasa kg. maweweh ngawentenang upacara panyangaskara pabresihan.
- (14) Yan wenten macihna anak wiyadin sang sapisira hugi, katedunan utawi kapangluh sajroning Pura Kahyangan sawewengkoning desa pakraman Alasngandang mababawos minangkenang pangandikan Ida Ratu Susuhunan utawi Bhatara, ring gelis tunasang tirta laluputan mangda gelis hudep. Pirade sasampun kaketisin tirtha, kanton ngatemel masera-masero, ngawetuwang sumandeya kayun pamaksane, irika patut

pintonin. Indike mintonin, hambalang toya apane, celebang limanyane makakalih. Yan mabukthi tan belus, nyandang gega pangandikan Bhatara. Yan pade belus, tan nyandang gega, gelisang gingsirang genahang mangda doh saking pura punika.

Kaping 5
Indik Cuntaka Sosot
Pawos 34

- 1) Sang sapasira hugi krama desa, sanc kahanan cuntaka, tan wenang ngaranjing ka Pura Kahyangan, ka panyucian kalaning nyuci gening, minakadi genah salwiring genah sane kinucap suci pingit. Tan wenang ngaryanin saji salwiring saji sane pacang katur ka sanggar tawang, sakadi suci gening, minakadi banten salwiripun sane jaga katur ka pura, miwah sane katur ring pitra pindha. Mungging banten sane pacang katur ka Prajapati, Dalem panguluning setra, dados karyaning ring umah sang cuntaka kalaning ngupakara sawa.
- 2) Lwir sane kinucap cuntaka :
 - ha. Anak Istri kalaning ngrajaswala, suwen cuntakane, saking ngawit ngrajaswala, kantos nyat, macihna sampun malukat.
 - na. Sang nganten lanang istri, suwene cuntaka, ngawit saking rahina pangantenane, wiyadin rahina marangkate, kantos puput mabyakawon, saha samayut prayascita malukat matirtha.
 - ca. Rama rena cuntaka sangkaning madruwe oka. Sane lanang cuntaka, suwene saking mbas anake alit, kantos kepus hodel nyane raris malukat. Sane istri pinaka rena, cuntaka petang dasa kalih dina saking wahu mbas rarene.
 - ra. Yan anak istri cuntaka sangkaning karuron, pateh ring cuntaka ngembasang oka, sane lanang cuntaka tigang rahina, saha sampun malukat.
- 3) Cuntaka malarapan antuk kasedayan, kapatyan :
 - ha. Yan wenten anak alit durung kepus hodel raris seda, rame renanne cuntaka 42 dina.
 - na. Yan sang ngarepin, minakadi sang magenah sajroning karang pomahan sang seda, suwene cuntaka saking wawu seda, kantos puput panglemek karyanne, punapike mapendhem, lwih yan atitiwa. Macihnayang punah cuntakane antuk mererebu utawi masesapuh manut dresta.

ca. Sang polih ninjo, ngarap sawa, ngamel saha ngarembat saetch-ete upakara pulalining sawa, cuntaka adine, punah cuntakane macihnayang antuk malukat.

ra. Sebel karang dados margiyang saking ngawit negtegang daging kantos Ida Bhatara masineb.

Wawanengan sebel karang hamung ring sang magenah sajroning karang sane kacuntakan, Yan wenten seda dados pacang ngamargiyang sebel karang, patut pendem makinsan kalaning wengi, tan polih panyanggran desa, sajaba sang patut tan dados pendem.

ka. Yan sang polih nyembah sawa, mangan paridan sawa, punika taler kabawos cuntaka, suwene cuntaka kantos sasampun husan malukat.

- 4) Cuntaka sangkaning malaksana mamitra ngalang. Suwene cuntaka salamine mamitra ngalang.
- 5) Anak wetu sangkaning mamitra ngalang, utawi tan pawidhi - widhana pawiwahan, babinjat, punika taler cuntaka. Suwene cuntaka, salamine durung wenten meras, wiyadin nuduk ngangkenin piyanak, utawi nganggen dadaman.
- 6) Cuntaka sangkaning mabhukti madruwe panyungkan sane tan siddha waras salamine, kadi hangganing hila, buduh, ngawijilang reged saking silit, bhaga, purus, tan henap mameres, brung borok tahunan mabanyeh, miwah salwir punika. Suwene cuntaka salamine tan waras.
- 7) Cuntaka sangkaning cedangga sane kabakta saking wawu mbas saking garbhawasaning ibu, punika tan kawenang napak palemahan panyuciyang genah nyuci gening.
- 8) Yan wenten sinalih tunggal sang cuntaka antuk ngaraksa sawa wiyadin layon, mamanah utawi mapakayun ngarawuhin karyya hayu atma - wedana, minakadi mabhakti ring sang wenang kabhaktinin, dados, nanging tan wenang ngarap, ngarembat, nyuwun, ngamel, saupakaran puspa lingga.
- 9) Yan wenten sinalih tunggal krama desa durung tutug cuntaka kadi hucaping harep, mamurug larangan, yan wenten ngatengahang ka desa, prajuru desa niwakang pamidandha, yogya sang mamurug marisudha sakabuwatan manut panglokika.
- 10) Yan wenten sinalih tunggal anak istri, sangkaning tan meha ngrajaswala sasampun ring pura, wiyadin ring genah larangane sawosan, raris kacirenan, wenang ya tiwakin dandha tanmeha, yogya marisuddha genah punika, katulung antuk pamaksan pura wiyadin pangemonge sowang.

- 11) Yan wenten sinalih tunggal krama desa, kacuntakan antuk ngraksa sawa, wiyadin layon, napkala pagilih pagantosan ngaci-aci ring sinalih tunggal kahyangan desa, pacaruwan ring desa, sadurung teteg sengker cuntakanya, wenang tan tedun mayahan, tan dinosan, nanghing yan wenten pasadok sang cuntaka ring prajuru desa. Yan wus tutug cuntakane, patut naregteg yan kari ngalantur patedunane. Munggwing piturunan, wawijilan daging salwir ipun, yoga katahur mahetang pangarga.
- 12) Yan cuntaka gamya gamana, prajuru desa nyantosang pamutus sang amawa rat. Yan wenten pamutus saking sang amawa bhumi, ring desa katiwakan dandha kadi ring sor puniki, lwire : mangda mrayascitta raga, genah malaksana, kahyangan desa, miwah desa pakaman. Prade yan sang katiwakan pamidandha mamandal, prasiddha desa sane mrayascitta desa miwah kahyangan, sang mamandal kabawosan ring desa, kicchen pamutus antuk Prajuru desa, manut pamutus pararem desa.
- 13) Cuntaka sangkaning mabhukti salah timpal, cuntaka ragan sang malaksana miwah desa pagenahanya. Tutug cuntakanya yan sampun sang malaksana mrayascitta ~~panyangaskara~~ ^{Penyangaskara} raga, genah malaksana, desane mrayascitta desa. Buron sane kangge somah kapademang tur katanem.
- 14) Anak luh beling tan kapariangken antuk lanange, suwenne cuntaka kantos wenten pangupakara panyangaskara kulawisuddha, anake istri beling mawidhi widhana pawiwahan masanding keris pinaka linggan sang kadalih.
- 15) Anak luh beling tan kapariangken, suwene cuntaka kantos lekad rarene, saha wenten pangupakara kula wisudha.
- 16) Yan wenten anak mabhukti nyolong smara, cuntaka pateh ring cuntaka gamya gamana.

Pawos 35

1) Indik Sosot.

ha. Yan wenten sinalih tunggal pacang nahur sosot wiyadin punagi, salwiring punagi, gumanti sane patut nganggen pamegat sot, tan dados nahur sot yan tan kalaning dina piodalan Bhatara. Ngadasa dinayang haci-aci, sang pacang nahur punagi patut sampun masadok ring pamangku pura, yan ring kahyangan desa panahurane, masadok ring pamangku desa miwah prajuru desa. Panahuran punagi ika, wawu kalaksanayang yan sampun puput pangodale.

na. Yan wenten sinalih tunggal nahur sasangi pacang ngaturang pangodal, hugi mangda ring dina pangantosan piodalane. Sang nahur punagi, wenang nunas kanti patulung karya ring pamaksan pura. Sang nahur sasangi nyuksrahang daging cumek saprabeyaning pangodal ring pamaksan pura.

ca. Yan wenten sinalih tunggal nahur sasangi maturan swaran tangguran salwiring tatabuan, sasolahan, minakadi salwir ipun, mungging prabeya punika sami kahangganin antuk sang masasangi.

2) Haturan :

Yan wenten sang sapa-sira hugi ngaturang jinah, mwan sarupaning barang, punika sami patut kahunadikayang antuk prajuru desa, kliyang pamaksan pura swang-swang, mangda kasiddhan mapwara hayu aturan punika kaungguhang sajroning lekita.

3) Sasarin Canang.

Sasampun puput pangaci-aci pujawaline, sasarin canang punika kapupulang saha kawilangin, antuk prajuru desa, kliyang pura, indik tatiwak kalih pamargin ipun, sangkaning jati nirmala.

Palet 2

Indik Resi Yadnya

Pawos 36

- (1) Krama desa Alasngandang yogyana ngawreddhiyang kapradnyanan, kauttaman Sang Hyang Aji, asewaka nunas pawarah ring sang maraga widagdha pradnyan, pingajeng ring sang kasinanggeh guru loka.
- (2) Prajuru desa, kliyan banjar, ngutsahayang kawreddhiyan kamuruban kauttaman Sang Hyang Aji, ngawentenang pasamuhan - pasamuhan, parembukan, pinaka genah krama desa mamanguhang pawarah-warah hayu.
- (3) Kalaning dewasa hayu, wenang desa matirtayatra, wenang desa ngaturang puniya miwah resi bhojana ring Ida Sulinggih taler kalaning karya utama. ring desa, salwiring karya sane kaputus antuk Ida Sulinggih patut ngaturang puniya. Asapunika taler ring sang mapitulung patut maweh dana.

- 4) Sang sapisira hugi krama desa Alasngandang yan mapakayun pacang mapodgala, taler mangda wenten pasadok pamihuning ring prajuru desa, sajaba patut polih Palugrahan saking Guru Wisesa.
- 5) Prajuru desa Alasngandang mamatut pisan, yan krama desane mapuniya ring sang pradnyan, ring sang widagdha, ring sang satata ngrajegang dharma. ping hajeng ring Ida Sulinggih pasuryan nyane sowang-sowang.

Palet 3

Indik Pitra Yadnya

Pawos 37

1. Pamarggi ngupakara sawa, hugi manut linging sastra Agama Hindu. Wenten makudang-kudang soroh, sakadi hinucap ring sor puniki :
- ha. Mapendhem ring prathiwi .
- na. Makingsan ring geni
- ca. Atiwa-tiwa, utawi palebon utawi ngaben.
- ra. Yan rare durung makupak huntu, wus kepus hodel hantaka, wenang ngangge pangentas bangbang masadhana klungah klapa gadhing, ngaran ngalungah, tan wenang tiniwaken.
- ka. Yan rare durung kepus hodel hantaka, pamali ngaran, pendhem juga tan hana pangupakaranya, kawala ganten utawi hadem paican Ida Sulinggih.
- (2) Sang sapisira hugi krama desa Alasngandang tan kawasa makta sawa ka desa pakraman, yan sawa ika sampun keni pangupakara sawa. Yan wenten mamurug, yogya katiwakan dandha, mrayascitta, marisuddha desa.
- (3) Salwiring upacara atiwa-tiwa, palebon, ngaben, ring setra hugi kawenanganya, tan wenang ring desa pakraman. Yan wenten mamurug, wenang dandha marisudha desa, krama desa sang atatulung dandha gung artha manut pangangan beras 10 kg kang sadiri saha mrayascita desa.
- (4) Yan wenten krama desa ngurung sawa, macamana mabresih, kawenanganya, tan kalugra lintangan ring asasih ngawit saking dina sedane. Yogya murnama tilem, miwah salwiring upacara rarahinan. Yan kalaning angurung sawa, sajroning desa pakraman Alasngandang kawangunang karya agung kantos nuci gening, lwire matabuh gentuh.

- bhatara turun kabeh, karya agung ring Besakih, yogya tumpang salune tedunang saking bale, genahang ring natah umahe, saking Bhatara kodhal kantos Ida masineb.
- (5) Tan wenang nyekeh sawa yan tan macamana, mabresih, lintangan ring roras dina, ngawit saking dinane seda Yan wenten mamurug, dandha gung artha manut pangargan beras 25 kg saha mrayascita desa.
- (6) Sang sapasira hugi krama desa pakraman Alasngandang tan wenang atitiwa, ri kala pangaci-acin desa lwire : patirthan, patatoyan, Bhatara Turun Kabeh, metabuh gentuh : ha. Yan piodhalan ring Pura Puseh, Pura Bale Agung miwah Pura Dalem, saking nigang dinayang aci kantos Bhatara puput masineb.
na. Yan karya Matabuh Gentuh, Bhatara Turun Kabeh, minakadi salwiring karya sane nyuci gening, saking ngawit nyuci kantos Bhatara puput masineb.
- (7) Yan wenten krama mendhem sawa kalaning dina malarang, kawasa, nanghing hugi masawen, durung magegemuk, laku kingsan ngaran sasampun polih lugraha saking prajuru desa.
- (8) Yan makingsan ring geni, sawa ginseng, hasti hinayut, manut krama. Yogya nganggen tirtha pabersihan. Mungging dewasa, sator ipun dewasane dados marginin mendem sawa.
- (9) Indik Padewasan :
- ha. Yening wenten krama desa pakraman sane maduwe kapatiyan patut masadok ring kliang desa Alasngandang
- na. Padewasan mendhem ring prathiwi utawi makingsan ring geni, wenang katiwakang antuk Prajuru Desa Pakraman.
- ca. Padewasan atiwa-tiwa, katiwakang antuk Ida Sulinggih sane pacang muput, yogya sampun kapatut antuk Prajuru Desa.
- 1). Indik larangan ngupakara sawa, sajaba ngunggahang ka tumpang salu, sane kamanggehang sajroning Desa Pakraman Alasngandang lwire : Buda Wage, Saniscara kliwon, Anggara kliwon. Redite Umanis, Sukra pon. Saniscara Wage, Redite Kliwon, ika semut sadulur. Sukra Kliwon, Saniscara Umanis, Redite Pahing, ika kala gotongan. Yan ring dora, muwah ring tanggal panglong ping 15, tanggal panglong ping 14, muwah tanggal panglong ping 1, Wraspati nuju tanggal panglong ping 1, 8. Yan ring Wrehaspati ingkel wong, ingkel wong awuku, yan wenten mamurug, dandha gung artha manut pangargan beras 10 kg, saha mrayascitta desa.

- 2). Mendhem sawa utawi makingsan ring geni tan kadadosang sadurung jam kalih sore, yan laku kingsan majalaran antuk wali utawi haci-aci patut kalaksanayang kalaning wengi tan nyuarayang kulkul
 - 3). Mendhem sawa tan kadadosang ritatkala wenten krama desa pakraman sane nanging sawa utawi ngebet, nanging makingsan kadadosang.
 - 4). Sang sapa-sira hugi jagi mendhem utawi atiwa-tiwa sajroning setra pakraman Alasngandang lintang ring adiri kalaning dewasa tunggil mangda sinarengan Yan wenten mamurug, dandha manut pangargan beras 10 kg. saha mrayascitta desa.
- ra. Tan wenang ngagah ngulung, teges ipun, sajroning setra tunggil, ten dados mresihin sawa, nuju dina pangutangan yan ring setra punika wenten ngalaksanayang pangabenan. Yan wenten mamurug, dandha gung artha manut pangargan beras 20 kg saha mrayascitta setra.
- (10) Tan dados nguwuk wiyadin ngebet sawa sadina-dina. Teges ipun : sajroning setra tunggila, yan wenten ngaben lintangan ring adiri, nyawa petaka, nyawa prenawa, sang pacang nyawa prenawa patut nguwuk sawa sinarengan ring sang pacang mreteka mabersih ring setra. Yan wenten mamurug dandha manut pangarga beras 25 kg. Saha mrayascitta setra.
 - (11) Yan wenten sawa tan kaparihangken ring wawengkon desa pakraman Alasngandang hingaranan bedaga desa, wenang pandem ring setra pangilang-ngilangin sasampun polih lugraha saking sang amawarat.
 - (12) Yan sawa sangkaning salah pati, angulah pati, mati kapangawan , minakadi salwir ipun, desa tan ngalarangin, yan sawa punika tiniwaken, pramangke. Sara ledang sang madruwe, minakadi Ida Sulinggih sane pacang muput.
 - (13).Yan wenten sinalih tunggal sawa , genahe seda wiyadin padem sajabaning karang pomahan, lwire : ring tegal, ring carik, pura, pasar, banjar, sekolah, minakadi genah sawosan dudu karang pomahan, yogya sang madruwe wirange mrayascitta marisuddha genah punika. Yan sawa tan kaparihangkenan, genah punika patut kaparisuddha ka prayascitta antuk sang madruwe hemponan.

Pawos 38

Indik Angatma wedhana.

- (1) Sang sapisira hugi krama desa Alasngandang, yan kalaning angatma wedhana, lwire :
Ngaroras, Patileman, Baligiya, tan wenang ngawangunang Payadnyan, petak, ring palemahan Pura Kahyangan Desa, minakadi kahyangan sawosan.
- (2) Sang sapisira hugi wus ngawangun karya angatma wedhana, yogya karang payadnyan punika pralina, sakasepipun petang dasa kalih dina saking dina karyyane.

Palet 4

Indik Manusa Yadnya

Pawos 39

- (1) Sang sapisira hugi krama desa Alasngandang ngawangunang salwiring upacara manusa yadnya, tan wenang magenah ring wawidangan palemahan kahyangan panyiwian desa. Yan wenten sinalih tunggal mamurug, wenang dandha gung atha manut pangargan beras 25 kg, saha mrayascita marisuddha pura punika.
- (2) Sane kalugra mawinten magenah ring pura sinalih tunggal, sang sapisira hugi krama desa sane pacang kahadegang dados pamangku, pinaka jan banggul Bhatara ring pura kahyangan hinucap. Taler sane kahadegang pinaka prajuru desa, wenang mawinten majaya-jaya ring pura Puseh Desa Pakraman Alasngandang.
- (3) Indik Manusa Yadnya sane dados kamargiyang sajroning desa pakraman Alasngandang hugi sane nganutin dresta kuna minakadi sastra Agama.

Palet 5

Indik Bhuta – Yadnya

Pawos 40

- (1) Sajroning Desa Pakraman Alasngandang pacaruan manut hunggwan, kalih sor singgih.
lwire:
ha. Pacaruwan Desa sadha kala
 - 1) Ring tanggun desa sisi kaler ngamasa-masa satunggil kajeng kliwon nyitan sasih kalima caru manca satha.

- 2) Ring pura kahyangan tiga kala dina kajeng kliwon uwudan sasih kalima caru manca satha.
 - 3) Ring tulak tanggul kala dina kajeng kliwon sasih kepitu caru manca satha mabayang-bayang banteng
 - 4) Ring catus patha utawi ring pampatan agung kala dina tilem sasih kasanga caru manca satha ngamasa-masa, manca sanak ngalimang masa, yan kasiddhan matabuh gentuh kalanturang antuk brata panyepian
- na. Pacaruan desa padgatakala, ri kala jagate kabrebhan, kagringan, kadurmanggalan, katiben panca-bhaya, miwah sane sawosan sane patut caronin.
- ca. Agung alit caru, manut hunggwan pacaru, babwatan pacaruwan, kalih nista Madhya utamaning caru.
- (2) Pacaruwan ring pura-pura kahyangan, pamrajan, dadya, salwire, manut drestan pura sowang, minakadi awig-awig gagaduhan pura hinucap.
 - (3) Yan sinalih tunggal Pura Kahyangan, salwire, reneng pangodale kantos tigang plabuh, wenang prajuru desa mamawosin. Yan wus puput babawose, yogya maguru piduka, ngawit masasapuh, mangda kasidhan ngaturang pangaci-aci.

SAT SARGAH
Sukreta Tata Pawongan
Palet 1
Indik Rangkat
Pawos 41

- (1) Indik rangkat punika manut desa kala patra, mwanng sima dreta, sane kapatutang tur katinutin antuk krama desa sowang-sowang, tan singsal ring uger-uger panagara, lwire :
 - ha. Papadikan;
 - na. Ngarorod;
 - ca. Ngunggahin
 - ra. Nyeburin utawi nyentana

- (2) Sajroning desa pakraman Alasngandang, indik rangkat ika yan sampun mawidhi widana pawiwahan, sanistanya mabiyakawon tur malukat, saha kasaksinin antuk prajuru desa rangkat punika kasinanggeh puput palikrama.
- (3) Yan wenten anak istri krama desa Alasngandang, karangkatang antuk sang sapisira hugi, Lwih antuk anak saking dura desa, yan kantos arahina ring awengi saking dina matinggale saking jumlah tan wenten pejati, yogya sang madruwe wirange nunas kanti ring prajuru Desa Alasngandang, mangda ngamargiyang sasrepan. Yan sampun sinah genahnya, ngraris kamargiyang panegdeg, tan kawasa makta sahananing sanjata saha nunas kanti ring sang amawa rat.
- (4) Sang sapisira hugi krama desa Alasngandang, yan karawuhan tamyu praya masinutan malarapan antuk ngarorod, hugi mangda masadok mihuningang ring prajuru desa, prajuru desa yogya maritetes, yan sangkaning tan patut pamargin rangkatnya, Prajuru Desa nguduhang mangda katur ring sang amawa rat. Yan wenten mamurug, yogya sang mamurug dandha gung artha manut pangargan beras 25 kg.
- (5) Yan wenten sinalih tunggal krama desa Alasngandang ngamet anak istri antuk mlegandang, mamendet, marikosa, miwah salwiripun, tan sangkaning sami demen, tan yogya pinuput widhi-widhana pawiwahannya sadurung wenten pamutus saking Guru Wisesa.
- (6) Yan wenten Sinalih tunggal saking dura desa, pacang muput rangkat kawawengkon desa pakraman Alasngandang sang madruwe wirang luh, yogya nunas pasaksi ring Prajuru Desa Alas Ngandang sinalih tunggal mangda wenten ngarawuhin.
- (7) Sang sapa sira hugi pacang muput rangkat utawi maserah yan saking desa pakraman Alasngandang patut nebas swaran kulkul manut pengargan beras 5 kg, yan saking dura desa keni Panebas swaran kulkul manut pengargaan beras 10 kg, panebas swaran kulkul punika ngaranjing ka banjar minakadi ka desa pakraman
- (8) Yan wenten sinalih tunggal krama desa Alasngandang ngamet anak istri pinaka rabi tan manut sima dresta minakadi sastra agama, yogya katur ring sang amawa rat mangda kabawosan saha polih pamutus.

Palet 2
Indik Belas Makurenan Utawi Nyapiyan
Pawos 42

- 1) Sane kabawos nyapiyan, punika sang palas marabi, palas makurenan, sane sampun katiwakan pamutus antuk Guru Wisesa, minakadi sampun kakrabang ring sangkepan Desa Alasngandang.
- 2) Yan wenten sinalih tunggal krama desa, ngarangkatang sapiyan, sadurung tigang sasih utawi 105 dina, saking dina palase, yogya sang ngarangkatang sapiyan punika keni dandha pakerang gung artha manut pangarggan beras 10 kg.
- 3) Krama desa sane belas marabi utawi makurenan, sasampun polih pamutus saking Guru Wisesa patut masadok mihuningang ring kliyang banjar, mangda kadamyakang ring Banjar ring Desa, sakasepipun asasih saking palase.
- 4) Yan wenten anak istri wit saking wawengkon desa pakraman Alasngandang nyapiyan mawali ka karang deha, yogya sang madruwe wirang matur supeksa ring Prajuru Desa, saha mrayascitta marisuddha anake luh punika. Yan tan kaparisuddha antuk wirangnya, patut marisuddha raga, mangda kasiddhan nirmala.

Palet 3
Indik Balu
Pawos 43

- (1) Sane kabawos balu, anak istri katinggal seda antuk rabine. Yan anak lanang seda rabine, wiyadin katinggal nyapiyan, taler kawastanin balu.
- (2) Yan wenten sinalih tunggal krama lanang wiyadin istri balu keni paayah-ayah miwah wawijilan manut kawenangannya.
- (3) Yan wenten sinalih tunggal anak istri balu kandugi marangkat, yogya rangkat punika kapuputang antuk wirang lakine rihin, yan babalon punika kari pageh.
- (4) Munggwing wawenangan babalon luh utawi rangda, ring indik wawarisan, minakadi sane sawos-sawosan, nganutin huger-huger sane karajegang antuk Guru Wisesa.

Palet 4
Indik Santana
Pawos 44

- (1) Sajroning desa Pakraman Alasngandang ngarajegang pidabdab Santana kapurusa sidikara tunggal, paperasan tunggal dadya, tunggal sidikara, santana rajeg.
- (2) Sang sapisira hugi sinalih tunggal krama desa Alasngandang, meras sentana, makedihang utawi nyerahang raga, yoga sangkaning radin, tunggal sidikara, tunggal dadya, saha polih palugrahan saking Guru Wisesa, kesiarang ring desa.
- (3) Santana rajeg inggih punika pratisantana wadon utawi pradana sane ngamanggehang lanang utawi purusa.
- (4) Sang sane kaharsayang santana rajeg hinucap inggih punika :
 - ha. Prati santana wadon tunggal utawi salah sinunggil prati santana wadon yening makasami prati santana wadon.
 - na. Sampun kamanggehang dados prati santana purusa
 - ca. Sang sane ngamanggehang santana rajeg patut masadok ring prajuru desa mangda kadamyakang ring desa.
- (5) Indik meras Santana, ngadegang santana rajeg, makedihang utawi nyuksrahang raga, sasampun sangkaning radin, yoga kadulurin antuk upacara manut sastra agama Hindu, sakabwatan sowang, sinaksenan dening prajuru desa Alasngandang, tur kasiarang ring desa, saha kapikukuhin antuk lekita sang amawa rat.

Palet 5
Indik Wawarisan
Pawos 45

- (1) Lwire sane wenang kawarisin :
 - ha. Hamong-amongan ring desa, ayah-ayahan saurah-arih.
 - na. Hutang pihutang sang ngawarisang.
 - ca. Saraja druwe, bhrana, tegal, carik, tatamiyan, sakancan kasugihan.
- (2) Sane wenang ngawarisin :
 - ha. Manut lalintih paprenahan adoh tampek saking purusa tunggal sidikara tunggal dadya.

na. Putra dadaman wiyadin putra paperasan.

ca. Santana rajeg.

ra. Sangkaning polih pitemes saking sang kawarisin sang madruwe salwir sane dados kawarisang, saking palugrahan Guru Wisesa, pinih akeh apahtigayan saking padruweyane maka piolah-olah pagunakayan.

Sang sapisira hugi krama desa Alasngandang, yan tilar saking Agama Hindu, santana rajeg kiesah mawiwaha, prati santana purusa ngarangkat nyeburin sowang-sowang kabawos ninggal kedaton tan yogya ngawaris sane kamulan patut warisin.

Ngedum warisan, kapatut pinih sor sasampun puput mahabenang sang ngawarisang bhrana kalih kasugihan punika. Sane dados dum, sajaba sane mangge padagingan

pangaci-aci, minakadi salwiring sane mangge piranti ngalaksanayang upacara Agama,

pustaka-pustaka sane kapingitang salwiripun.

SAPTAMAS SARGAH

Wicara Lan Pamidandha

Palet I

Indik Wicara

Pawos 46

Salwiring wicara indik pakraman, ring wawidangan desa pakraman Alasngandang, wenang rinawosan antuk Prajuru desa. Yan tan kasiddhan puput, Prajuru desa ngaturang ring Guru Wisesa, buwat matatimbang.

Yan wenten wicara indik pakraman ring banjar, tempek banjar, pamaksan, subak, minakadi sekeha-sekeha sawosan, yogya kabawosan antuk Prajurunya sowang. Yan tan kasidhan puput, wenang katengahang ka desa, Prajuru Desa yogya mamawosin.

Yan pamutus wicara sane katiwakang antuk Prajuru Desa Pakraman Alasngandang, tan katinutin utawi tan kahiring antuk sang mawicara, wenang sang mawicara nunasang pangrawos ring sang patut mamawosin, ring Guru Wisesa.

Yan sang mawicara taler tan tinut ring pamutus wicara sane katiwakang hinucap ring hajeng, prasidha sang mawicara tan polih panyanggran minakadi tan dados nganggen sapadruwen desa, kantos puput wicaranya, dosane mamandal ring desa.

Sang sapisira hugi krama desa Alasngandang mekarya wicara miwah byuta minakadi nyagur, nyepakin krama desa sewosan, mawosang prajuru sane nenten becik, wenang keni pamidar. La gung artha manut paswaran desa.

Palet 2
Indik Pamidandha
Pawos 47

- (1) Lwir pamidandha sane wenang katiwakang antuk Prajuru Desa, Banjar, Tempek Banjar pakraman, pamaksan, sekcha-sekcha sawosan, sawawengkon Desa Alasngandang sakadi ring sor puniki :
- ha. Dandha artha.
 - na. Upasaksi, dewa saksi, pangrarata, sumpah.
 - ca. Dandha panyangaskara, lwire : mrayascita, marisuddha, miwah salwir ipun.
 - ra. Kasepekang, kaheladang.
 - ka. Pamidandha sawosan manut palugrahan Guru Wisesa.
- (2) Patiwak pamidandha, manut hunggwan wicarane sowang-sowang, minakadi werat ring wicara hinucap, lwire :
- ha. Yan wicara ring Desa Pakraman, yoga kapidandha antuk desa. Mungging dadandhan mantuk ka desa.
 - na. Yan wicara ring tempek banjar katiwakang pamidandha ring tempek banjar punika, dedandan mantuk ring tempek banjar
 - ca. Yan wicara ring Banjar Pakraman, katiwakin pamidandha ring banjar ika, dadandhan mantuk ka banjar.
 - ra. Yan wicara ring pamaksan minakadi ring sekcha-sekcha sawosan, katiwakang pamidandha ring kuwu tempekanya.
- (3) Agung alit dadandhan, manut panglokikan agung alit werat ringan kasisipanc, sane mungguh ring awig - awig gagaduhanya sowang, minakadi paswara pinaka pamutus paruman.
- (4) Krama desa sane nenten nawur urunan miwah dedandhan polih petanggeh asangkepan lintang tigang rahina, prade ngalantur nenten katawur keni paningkel. Yening urunan wawangunan polih petanggeh ngantos melaspas lintang ring tigang rahina prade ngalantur nenten katawur patut keni panikel. yan kantos wetu wicara kabawosan antuk prajuru desa manut paswaran desa
- (5) Krama desa sane nyelang druwen desa minakadi jinah ring Lembaga Perkreditan Desa ring CBD, yan kantos wetu wicara kabawosan antuk prajuru desa manut paswaran desa.

ASTAMA SARGAH
Nguwah-Nguwuhin Awig-Awig
Pawos 48

- (1) Sane wenang uwahin inggih punika, pasukretan, paswara, pamutus pararem, wiyadin pamutus pasamuhan miwah sane sawosan sapanunggilan ipun.
- (2) Sane wenang uwuhin inggih punika, pasukretan, paswara, wiyadin pamutus pasamuhan miwah sane sawosan sapanunggilan ipun.
- (3) Indik nguwahin kalih nguwuhin pasukretan, paswara, pamutus pararem, wiyadin pamutus pasamuhan miwah sane sawosan, manut tata kramaning pasamuhan.
- (4) Indik nguwahin kalih nguwuhin Awig-awig, manut tata kramaning pasamuhan, sasampun nunas tatimbang ring Guru Wisesa kalih polih palugrahan sang amawa bhumi.

NAWAMA SARGGAH

Pamuput

Pawos 49

- (1) Awig-awig puniki mawasta : "AWIG-AWIG DESA PAKRAMAN ALASNGANDANG".
- (2) Awig-awig puniki pinaka bantang sahananing awig-awig, paswara, pasukretan, miwah salwir ipun, sane mangge ring swang-swang tempek banjar, banjar pakraman, pamaksan pura, sekeha-sekeha sane wenten sajroning Desa Pakraman Alasngandang.
- (3) Tempek banjar, Banjar, kahyangan, pamaksan, sekeha-sekeha sane wenten sajroning Desa Pakraman Alasngandang wenang ngawangunang awig-awig, pasukretan, paswara, gagaduhan, swang-swang, nanging daging ipun tan yogya singsal tungkas ring Awig-awig Desa Pakraman Alasngandang.
- (4) Salwiring sane durung mungguh ring Awig-awig puniki. kaungguhang sajroning paswara, pamutus pasamuhan Desa Pakraman Alasngandang.
- (5) Dresta kuna sane kari dados angge, yan tan tungkas ring daging awig-awig desa pakraman Alasngandang manut kojaring sastra Agama Hindu, hanut ring Uger-uger nagara, saha kaputusan sajroning paruman Desa Pakraman Alasngandang.

- 6) Awig-awig Desa Pakraman Alasngandang, pawangun krama desa pakraman Alasngandang kapastika kala dina Buda Kliwon Wuku Pahang pinanggal 29 sasih Mei warsa 2002, magenah ring Pura Dalem Alasngandang.
- 7) Awig-awig puniki kalingga tanganin antuk Kelian Desa Pakraman Alasngandang, kasaksinin antuk Kelian Banjar Dinas Alasngandang, Perbekel Pempatan lan Camat Rendang.
- 8) Awig-awig Desa Pakraman Alasngandang puniki kalaksananya ngawit dina kalingga tanganin kantos selantur ipun.
- 9) Lwir sang ngalingga tanganin :

Alasngandang, 1 Juni 2009.


 KLIAN DESA PAKRAMAN ALASNGANDANG
 I WAYAN WENDANG
 KEC. RENDANG ARIAWAN, SE., MM

MAKA SAKSI :


 PEMERINTAH KABUPATEN KARANGASEN
 Kelian Banjar Dinas Alasngandang
 I WAYAN MEDAL


 PERBEKEL PEMPATAN
 KECAMATAN RENDANG KARANGASEN


 PEMERINTAH KABUPATEN KARANGASEN
 CAMAT RENDANG
 DR. I WAYAN WIDIKA, M.Si.
 1989031003